



Dr Selfie-Waan

Überaal ka me se gsee und fascht jeede hets schon emool gmacht,
e Fotti vo sich sälber ins Netz do und drbii in d'Linse glacht.
Aber nit äifach irgend e Bildli, woo äine für di duet schiesse.
Es isch äins, woo du d'Kamera sälber heebesch und alli duesch griesse.
Nimmsch e Kamera, machsch e Fotti vo dir sälber, me nennts e Selfie.
Egal wenn und woo, in jeedere Situazioon, dr Momänt goot nie verbii.
Bispiil gits viil uf allne soziaale Netz, me findet alles was so bassiert.
Däilts denn mit dr Wält aber mir frooge uns: Wär das intressiert?

„Lueg ich bi Bappe woorde und das isch mi Binggis, isch är nit siess?
Ha grad e Selfie vo uns gmacht und schigg öich allne liebi Griess“.
„Sali zämme ich bi grad im Ussgang, bi guet druff und e bitz bsoffe.
Das nääbe mir isch min Koleeg är isch voorig grad in e Pfoschte gloffe.“
„Ich schigg öich e Bild vo mir mitem schöne Miggeli an dr Site.
Has denn erscht am andere Daag gsee dasch joo e gruusigi Gritte.“
Schiints muess me hütt alles mit allne däile, es liggt äifach im Trend.
E Fotti vo sich mache und e Thäggscht drzue, dass me äim kennt.

Äine für e Uusefoorderig im Netz nomminiere viili diens begreisse.
Für ins Wasser springe oder e Küübel mit lis über sin Kopf z'giesse.
Das alles muess natüürlig gfilmt wärde, dass es au joo jeede glaubt.
Viil Lüt woo au döört mitmache, s'het uns dr letscht Näärv graubt.
E Selfie e Moodeerschiinig, woo immer grösseri Ussmaass aanimmt.
Me fötteleet sich in ungläubliche Laage, dr Näärvekitzel stimmt.
Mir wänn do nit lang drum umme reede und saages kurz und knapp.
Dä ganzi Selfie-Waan isch uns zviil, die hän doch alli en Egge ab.

E Mänge Bilder vo bekannte und unbekante Lüt sin im Netz umme.
Schööni und unschööni Sache kasch gsee und au die ganz Dumme.
Viil Lüt saage noch dr Party: „Was mach ich uff däm Bild für e Drägg?“
Aber was emool online isch bekunnsch praktisch nümmi wägg.
Au Persoone us dr Bolitigg und dr Promiwält hän das scho erlääbt.
Phiinligi oder unseriöösi Fotti vo sich sälber ins soziaale Netz glääbt.
Wenn denn die Bildli in die falsch Händ dien groote wirds bereut.
„Hät ich doch das Selfie vo mir nit äifach im Internet ummegstreut.“

Dr Selfie-Waan me hets Gfüül dä het jetzt denn bald jeede phaggt.
Es isch wiene Süüch, woo sich äin nachem andere schnappt.
Aber es isch wie bi jeedere Krankhät wenn me se nit behandle duet.
Je nach Ussmaass und Sterggi duet si dir uf d'Lengi nit bsunders guet.
Durch dr Selfie-Waan dien mängi Lüt über d'Folge nit überlegge.
Jeede duet drum sini Fratze irgendwoo im Internet hinterlegge.
D'Folge woott me gar nit gsee und macht witer mit däm Waan.
Bass uf di uf, mir hoffe di wirft e schlächts Selfie nit us dr Baan.

E schööni Fasnacht.

www.escargots-fratze.ch



Hilf dr bescht Wage vo dr Fasnacht zfinde und schigg e
SMS (Fr. 0.40/SMS) vom Morge- bis Ändstraich mit em
Inhalt: Waage (Nr.)
(Mir hän d'Nummere 088!! ☺)
an dNummere 9234 und gwinn e Goldvreneli

PS:
D Ladäärne-Uustellig uff em Minschterplatz und
D Waage- und Reggwisyte-Uustellig bi dr Kasäärne
sin vom Määntig znacht bis am Mittwuch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde
und dr Rädäbäng kaufe.

Am Fritig und Samschtig, 26. und 27. Februar isch
Noochwuggswärbig vo dr 1. Lektion im Zält uff em Barfi.

D'Zeedellääsete isch am Sunntig noh dr Fasnacht 2015 am
1. Merze im Käller vo dr Baseldytschi Bihni im alte
Lohnhof, 17 – 19 h. Dr Ytritt isch frey, s Drimmelikässli
hänggt aber am Usgang fir freywilligi Spände an dr Wand.